



26. oktobari 2017

UKA2017/102

Nunat Avannarliit suleqatigiinnerat pillugu nassuiaat 2017

(Peqqissutsimut Nunanullu Avannarlernut Suleqateqarnermut Naalakkersuisoq).

Nunat avannarliit pillugit naalakkersuisut nassuiaasiaata oqallisiginissaanut Siumumiit imaattumik oqaaseqassuugut:

Nunarput nunat avannarlerni suleqatigiinnermi peqataanera illersortuartariaqaripput Siumumiit isumaqarpugut.

Nunat avannarliit suleqatigineqarneranni nunat arfineq-marluk suleqatigaavut, taakkunani naalagaaffiit tallimat aammalu nunat immikkoortui namminersortut marluk. Ministerit ataatsimiinnerini naligiimmik nunatta inissisimatineqarnera assut pingaaruteqarpoq, naak immaqa aningaasaliinikkut annertunngitsumik nunarput peqataagaluartoq aalajangernissani pingaarutilinni peqataatinneqartarnera iluarisimaaratsigu oqaatigissavara. Taamatuttaaq Nunatta inatsisartui marlunnik inissisimatitaqarnerat naligiimmik pitsaasumik inissisimasoq oqaatigerusunnarpoq, taamaakkaluartoq oqaatigerusunnarpoq nunat Helsingforsimi isumaqatigiissutip iluani qassinik ilaasortaataqarsinnaanerata oqallisigeqqinneqarsinnaanera peqataaffigisinnaagatsigu. Tassa naalagaaffiit Danmark, Sweden, Norway aamma Finland aallaqqaataani tamarmik 20-inik ilaasortaataqarmata. Danmarkip sisamat nunatsinnut savalimmiunullu tunniussimavai aammalu Finland Ålandip inissaanik marlunnik aamma tunisiffiginikuullugu.

Soqutiginarsinnaaqaq nunarput tapersiiuassappat saamit ilaasortatut peqataasarsinnaanissaannik sorsoqatigissallugit. Taakkumi aamma tassaapput nunap immikkoortuini nammineerlutik naalakkersuinikkut inissisimasut.

Siumumiit nuannaarutigilluinnakkatta ilagaat nunatsinni oqaatsivut Nunat avannarlerni oqaatsitut allatuulli nalitut nalunaarutigineqarmata aammalu taamaasilluni periarfissaqartilluni piumasaaqaataalersinnaalluni nutserinikkut oqaatsivut atorlugit sulinissaq.

Tamanna Siumumiit upernaakkut 2016-imi Nuummi Nunat avannarliit siunnersuisooqatigiivisa isumasioqatigiissinneranni noqqaassutigaarput, qujanarporlu sukkasuumik anguneqarmat.

Naggataatigut nuannaarutigalugu oqaatigiumavara, aappaagu Nunat avannarliit siunnersuisooqatigiivisa septemberimi naapinnerat nunatsinni ingerlanneqartussanngormat. Tamanna angusatsialaavoq aammalu suliassaassalluni annertoq.

Taamatut oqaaseqarluta Siumumiit naalakkersuisut Nunat avannarliit suleqatiginerat pillugu nassuiaataat tusaatissatut tiguarput.

Ineqi Kielsen

Siumut